

官常典

官常典第五百十一卷

將帥部名臣列傳六十九

宋十三 李浩

按宋史本傳浩字直夫家本綏州徙西河浩務學通兵法以父定蔭從軍破儂智高韓絳城囉兀領兵戰賞堡嶺川殺大首領訛革多移斬首千三百餘級積官供備庫副使廣西都監襄西北疆事著安邊策謁王安石安石言之神宗召對改管幹麟府兵馬未行又從章惇於南江引兵由三路屯鎮江入遂州討舒光貴破盈口柵下天府會于洽州入懿州蠻酋田元猛元喆合狴狴拒官軍浩分兵擊之殺狴狴降元猛元喆遂城懿州進討黔江蠻復城黔江惇上其功謂不當與他將比擢引進副使熙河鈐轄李憲討山後羌浩將右軍至合龍嶺會戰遣降羌乞噶輕騎突敵帳俘其酋冷雞朴李密撒馘三千遷東上閣門使爲副總管知河州安撫洮西五路大舉浩將前軍復蘭州遷引進使隴州防禦使知蘭州兼熙河涇原安撫副使坐西關失守及報上不實再貶秩旋以戰吃囉瓦井連立功復之哲宗卽位拜忠州防禦使捧日天武都指揮使馬軍都虞候進黔州觀察使歷鄜延太原永

興環慶路副都總管再知蘭州卒贈安化軍留後

和斌

按宋史本傳斌字勝之濮州鄆城人選隸散直爲德順軍指揮使凡五年數扞敵被重創十餘知軍事劉兼濟以兄平敗沒執送京師并逮其家斌慰安調護爲寓金帛他所密告兼濟勿以家爲恤平冤旣伸兼濟獲免家賴以全定川之役將曹僕喪所乘馬斌輟騎與之且戰且行與俱免狄青南征使部騎兵爲前鋒青駐賓州十日以怠寇旣乃倍道兼行斌以兵疲於險利在速戰卽日度關鏖戰歸仁驛孫節死斌引騎血戰繞出賊後遂敗之師還張破賊陳形於殿廷仁宗拊勞擢文思副使權廣西鈐轄改秦鳳廣西以蠻事乞留秦州亦請之詔留廣西累歲徙涇原召對議者謂交州可取斌盛言有害無益願戒邊臣無妄動神宗歎曰卿質直如此乃知兩路爭卿爲不誣矣進帶御器械渭部饑帥王廣淵命吏賑給斌曰救之無術是殺之耳廣淵以委斌斌擇地營居養視有法所活以萬數安南入寇復徙廣西累遷皇城使昭州刺史撫水蠻羅世念犯宜州守將戰死斌提步騎三千進討方暑晝夜趣兵至懷遠寨曰此要害之地得之則生或曰奈何背龍江邪笑曰是所以生也因示

弱驕之蠻果大至斌選將迎敵戒以遇之則走誘至平坂列八陣以待之張疑兵左右山上蠻登嶺望見始大驚斌分騎翼其旁自被甲步出爲衆士先殊死戰蠻大敗世念率酋黨四千八百內附遂以榮州團練使知宜州遷西上閣門使知邕州以老請還除高陽關副總管歷永興軍路召拜龍神衛四廂都指揮至步軍都虞候卒年八十贈寧州防禦使斌老於爲將以恩信得邊人心嶺南珍貨一無所蓄邊吏欲希功造事皆憚不敢發或巧爲諜報啟釁亦必折其姦謀故所至無事士大夫稱之

曲珍

按宋史本傳珍字君玉隴干人世爲著姓寶元康定間夏人數入寇珍諸父糾集族黨禦之敵不敢犯於是曲氏以材武長雄邊關珍好馳馬試劍嘗與叔父出塞游獵猝遇夏人陷其圍中馳擊大呼衆披靡得出顧叔不至復持短兵還決鬪遂俱脫秦鳳都鈴轄劉溫潤奇其材一日出寶劍令曰能射一錢於百步外者與之諸少年百發不能中珍後至一矢破之從溫潤城古渭與羌戰先登陷陣爲綏德城監押提孤軍拒寇斬其大會如閣門祇候有功洮西遷內一崇班郭達趙禹南征爲第一

將進自右江撫接廣原三州十二縣降僞守已下百六十人老稚二萬六千口是行也功最諸將遷西染院使得疾輿還京師神宗遣使臨問少間令入對珍念二帥不和睦上問必及之言之必形曲直將何以對乃以餘疾未平爲解帝復使獎勞賜之弓劍鞍勒令有司蠲其鄉徭賦擢鄜延鈐轄進副總管從种諤攻金湯永平川斬二千級累遷客省使拜懷州防禦使龍神衛四廂都指揮使徐禧城永樂珍以兵從版築方興羌數十騎濟無定河覘役珍將追殺之禧不許諜言夏人聚兵甚急珍請禧還米脂而自居守明日果至禧復來珍白敵兵衆甚公宜退處內柵檄諸將促戰禧笑曰曲侯老將何怯邪夏兵且濟珍欲乘其未集擊之又及不許及攻城急又勸禧曰城中井深泉罄士卒渴甚恐不能支宜乘兵氣未衰潰圍而出使人自求生禧曰此城據要地奈何棄之且爲將而奔衆心搖矣珍曰非敢自愛但敕使謀臣同沒於此懼辱國耳數日城陷珍縋而免子弟死者六人亦坐貶皇城使帝察其無罪諭使自安養以圖後效元祐初爲環慶副總管夏人寇涇原號四十萬珍擣虛馳三百里破之曲律山俘斬千八百人解其圍進東上閣門使忠州防禦使卒年五十九珍善撫士卒得其死力雖不知書而忠樸好義本於天性

劉闔

按宋史本傳闔字靜叔青州北海人以拳力爲軍校從延州軍出塞遇敵矢貫左耳戰不顧衆服其勇從文彥博討貝州次城下攀壘欲登賊以曲戟鉤其甲闔裂之而墜議者欲穿地道入闔曰穴地積土賊且知之城瀕河若晝囊土而夜投諸河宜無知者彥博以爲然穴成闔持短兵先入衆始從遂登陴引繩而上遲明師畢入貝州平功第一擢虎翼指揮使累遷宣武神衛都指揮使昭州刺史辰州團練使韓絳宣撫陝西詔闔自河東爲犄角至鐵冶溝夏人大集衆懼闔自殿後率銳驍搏戰飛矢蔽體不爲却敵解去爲冀州駐泊總管河水漲提防墊急闔請郡守開青楊道口以殺水怒莫敢任其責闔躬往溶決水退冀人賴之以左金吾大將軍致仕卒年八十五

賈富

按宋史本傳富字民瞻開封人少時善騎射喟然嘆曰大丈夫生世要當自奮揚名顯親可也遂起家從戎神宗選材武以爲內殿承制慶州荔原堡都監林廣討瀘夷辟將前鋒又爲河東將敗西夏兵於明堂川累功轉莊宅副使遷路監紹聖中夏兵數萬圍麟州神堂砦甚急富以數百騎往援令

古今圖書集成
其下曰國家無事時不惜厚祿養汝輩正以待一旦之用耳今力雖不敵吾誓以死報衆感厲卽循
屈野河行且五里據北攔坡嶺上一矢殪其酋衆駭潰哲宗嘉歎賜以袍帶知皇城使威州刺史遷
路鈐轄當在兵間二十年有智略能拊御士卒所鄉輒勝時以良將入對留擢龍神衛四廂都指揮
使遷步軍都虞候濠州團練使卒年五十二贈雄州防禦使

張整

按宋史本傳整字成伯亳州鄆陽人初隸皇城司御龍籍補供奉官爲利文州都巡檢使邊夷歲鈔
省地吏習不與校至反遺之物留久乃去整惡其貪暴無已密募死士時其求掩擊幾盡有司劾生
事神宗壯之不問調荆湖將領拓溪蠻地築九城董兵鎮守又破蠻於大田歲中三遷狷矜萬衆乘
舟屯托口迫黔江城時守兵才五百人情大恐整伏其半於托口旁戒曰須吾旦度金斗崖舉幟則
譟而前及旦率其半縛艤建旗鼓泝流急趨賊望見大笑幟舉伏發前後合擊人人殊死鬪蠻騰
踐投江中殺獲不可計爲廣西鈐轄坐殺降猺責監江州酒稅復爲涇原眞定京東環慶鈐轄整蒞
軍嚴明哲宗嘗訪於輔臣召之對擢爲龍神衛四廂都指揮使管幹馬軍司卒官至威州刺史

燕達

按宋史本傳達字逢辰開封人爲兒時與儕輩戲輒爲軍陳行列狀長老異之旣長容體魁梧善騎射以材武隸禁籍授內殿崇班爲延州巡檢戍懷靈砦夏人三萬騎薄城戰竟日不決達所部止五百人躍馬奮擊所向披靡擢鄜延都監數帥兵深入敵境九戰皆以勝歸囉兀之棄走遣達援取戍卒輜重爲賊所邀且戰且南失亡頗多神宗以達孤軍遇敵所全亦不爲少累遷西上閤門使領英州刺史爲秦鳳副總管討破河州羌遂降木征遷東上閤門使副都總管眞拜忠州刺史龍神衛四廂都指揮使郭達招討安南爲行營馬步軍副都總管入辭神宗諭之曰卿名位已重不必親矢石第激勉將士可也達頓首謝曰臣得憑威靈滅賊雖死何憚初度嶺聞前鋒遇敵苦戰欲往援偏校有言當先爲家計然後進者達曰彼戰已危詎忍爲自全計下令敢言安營者斬乃卷甲趨之士皆自奮傳呼太尉來蠻驚潰卽定廣原師次富良江蠻艤闕船於南岸欲戰不得達默計曰兵法致人而不致於人吾示之以虛彼必來戰已而蠻果來擊之大敗乃請降師還拜滎州防禦使以主帥得罪而獨蒙賞乞同責不聽元豐中遷金州觀察使加步軍都虞候改馬軍超授副都指揮使以訓閔

精整除一子閣門祇候數被詔獎進殿前副都指揮使武康軍節度使哲宗立遷爲使徙節武信卒贈開府儀同三司諡曰毅敏達起行伍喜讀書神宗以其忠實可任每燕見未嘗不從容嘗問用兵當何先對曰莫如愛帝曰威克厥愛可乎達曰威非不用要以愛爲先耳帝善之

劉昌祚

按宋史本傳昌祚字子京真定人父賀戰沒於定州錄爲右班殿直主秦州威遠砦青塘聚兵鹽井經年不散昌祚奉帥命往詰之諸酋曰聞漢家欲取吾井鹽昌祚曰國家富有四海何至與汝爭此邪與酋俱來犒賚之歡然帥衆去遷西路都巡檢使遼還神宗臨試馳射授通事舍人夏人寇劉溝堡昌祚領騎二千出援鹵伏萬騎於黑山而僞遁卒遇之戰不解薄暮大會突而前昌祚抽矢一發殪之餘衆悉遁帥李師中上其功曰西事以來以寡抗衆未有如昌祚者知階州討平母家等族又平疊州轉作坊使爲熙河路都監從王中正入蜀破竄羌加皇城使榮州刺史秦鳳路鈐轄又加西上閣門使果州團練使知河州元豐四年爲涇原副都總管王師西征詔與總管姚麟率蕃漢兵五萬受環慶高遵裕節制令兩路合軍以出旣入境而慶兵不至昌祚出胡盧川次磨齊隘夏衆十

萬扼險不可前昌祚挾兩盾先登夏人小却師乘之斬首千七百級進次鳴沙川取其窖粟遂薄靈州城未及闔先鋒奪門幾入遵裕馳遣使止之昌祚曰城不足下脫朝廷謂我爭功奈何今按甲勿攻是夕慶兵始距城三十里而軍遇敵接戰昌祚遣數千騎赴之遲明賊已退遂謁遵裕許應援之緩有誅昌祚意既見問下城如何昌祚曰比欲攻城以幕府後未敢前日磨齊之戰夏衆退保東關若乘銳破之城必自下遵裕弗內曰吾夜以萬人負土囊傳壘至旦入矣怒未解欲奪其兵付姚麟麟不敢受乃已明日遣昌祚巡營凡所得馬糧悉爲慶兵所取涇師忿譟遵裕圍城十八日不能下夏人決七級渠以灌遵裕師軍遂潰卽南還復命涇師爲殿昌祚手劍水上待衆濟然後行爲鹵所及戰退之至渭州糧盡士爭入無復行伍坐貶永興軍鈐轄明年復徙涇原加龍神衛四廂都指揮使知延州時永樂方陷士氣不振昌祚先修馬政令軍中校技擊優者乃給焉自義合至德靖砦綿互七百里堡壘疏密不齊烽燧不相應昌祚度屯戍險易地望遠近事力彊弱立爲定式上諸朝夏人寇塞門安遠砦拒破之殺其統軍葉悖麻咩毗埋二人蓋始謀攻永樂者圖其形以獻帝喜遣近侍勞軍哲宗立進步軍都虞候雄州團練使知渭州歷馬軍殿前都虞候渭地宜牧養故時弓箭

手人授田二頃有馬者復增給之謂之馬口分地其後馬死不補而據地自若昌祚按舉其法不二年耗馬復初又括隴山間田得萬頃募士卒五千別置將統之勁悍出諸軍右朝廷歸夏人四砦昌祚以爲不可再遷殿前副都指揮使冀州觀察使武康軍節度使年六十八卒贈開府儀同三司諡曰毅肅昌祚氣貌雄偉最善騎射箭出百步之外夏人得箭以爲神持歸事之所著射法行於世

折可適

按宋史折德辰傳德辰曾孫克行克行從子可適未冠有勇馳射不習而能鄙延郭達見之歎曰真將種也薦試廷中補殿侍隸延州從种諤出塞遇敵馬以少年易之可適索與鬪斬其首取馬而還益知名米脂之役與夏人戰三角嶺得級多又敗之於蒲桃谷東兵久不得食千人成聚籍籍於軍門或欲掩殺以爲功可適曰此以饑而逃耳非叛也軍馬出詰之曰爾輩何至是不爲父母妻子念而甘心爲異域鬼邪皆回面聲喏流涕謝再生各遣歸羌夏人十萬入寇可適先得其守烽卒姓名詐爲首領行視呼出盡斬之烽不傳因卷甲疾趨大破之于尾丁磴回次檉楊溝正午駐營分騎據西山曰彼若躡吾後腹背受敵必敗果舉軍來可適所部纔八千轉戰至高嶺乃從間道趣洪德設

伏邀其歸路敵至伏發衝之其國母踰山而遁焚棄輜重雖帷帳首飾之屬亦不返衆相蹈藉赴崖澗死者如積論前後功至皇城使成州團練使知岷蘭州鎮戎軍渭卽章案合熙秦慶三道兵築好水川命總管王文振統之而可適將軍爲副熙州兵十人失道盡死文振歸罪於可適案卽下之吏宰相章惇欲按軍法哲宗不許猶削十三官而罷案請留以責效乃以權第十二將鬼名阿埋昧勒都逋皆夏人桀黠用事者詔可適密圖之會二酋以畜牧爲名會境上可適諜知之遣兵夜往襲并俘其族屬三千人遂取天都山帝爲御文德殿受賀以其地爲西安州遷可適東上閤門使洛州防禦使涇原鈐轄知州事真拜和州防禦使進明州觀察使爲副都總管卽鍾傳行邊爲敵所隔以輕騎拔之得歸傳議取靈武環慶亦請出師命可適將萬騎往卽薄靈州川夏人扶老挾稚中夜入州城明日俘獲甚夥而慶兵不至乃引還詔使入覲帝以傳策訪焉對曰得之易守之難當先侵弱其地待吾藩籬旣固然後可圖帝曰卿言是也進武安軍節度觀察留後步軍都虞候大城蕭關與傳議齟齬會覆師數百於踏口傳劾之貶鄆州觀察使俄知衛州拜淮康軍節度使轉運使請於平夏通峽鎮戎西安四砦分築塲圃置芻粟五百萬可適以費大難之又欲借車牛以運及致十萬斛於

熙河皆戾其意乃中以疑謗召爲佑神觀使明年復以爲渭州命其子彥質直祕閣參軍事數月而卒年六十一彥質紹興中簽書樞密院別有傳

姚麟

按宋史姚兕傳麟字君瑞兄兕攻河州時俱在兵間中矢透骨鏃留不去以彊弩出之笑語自若積功至皇城使爲秦鳳副總管後李憲討生羌擒冷雞朴再轉東上閣門使英州刺史元豐西討以涇原副總管從劉昌祚出戰勝於磨礪隘轉戰向鳴沙趨靈州而高遵裕敗還降爲皇城使永興軍路鈐轄復爲涇原副總管夏人修貢且乞蘭會壤土麟言夏人囚其主王師是征今秉常不廢卽爲順命可因以息兵矣獨蘭會不可與願戒將帥飭邊備示進討之形以絕其望從之督諸將討堪哥平經略使盧秉上其功狀賜金帛六百元祐初擢威州團練使龍神衛四廂都指揮使歷步軍殿前都虞候步軍馬軍副都指揮使紹聖三年以建武軍節度觀察留後出知渭州安燾請留之曾布曰臣嘗訪麟禦邊之策及熙河疆域俱不能知願加敕倣使之盡力韓忠彥曰奏對語言非所以責此輩哲宗乃留麟不遣尋拜武康軍節度使殿前副都指揮使王瞻取青唐麟以爲朝廷討伐方息肩奈

何復生此大患已而贍果敗徽宗立進都指揮使節度建雄定武軍檢校司徒卒帝詣其第臨奠贈開府儀同三司麟爲將沈毅持重不少縱捨宿衛士嘗犯法詔釋之麟杖之於庭而後請拒詔之罪故所至肅然

姚雄

按宋史姚兕傳兕子雄字毅夫少勇鸞有謀年十八卽佐父征伐從討金湯以百騎先登奪隘又成荔原之功韓絳薦其材閔試延和殿安南瀘川之役皆在軍行歷涇原秦鳳將駐甘谷城知通遠鎮戍軍岷州官累佐騏驥使紹聖中渭帥章楶城平夏雄部熙河兵策援夏人傾國來與之鏖鬪流矢注肩戰栗厲賊引卻追躡大破之斬首三千級俘鹵數萬先五日折可適敗於沒烟士氣方沮雄賈勇得雋諸道始得并力城成擢東上閣門使秦州刺史明年鹵攻平夏勢銳甚城幾不守雄與弟古合兵卻之徙知會州兼熙河鈐轄王瞻略地青唐羌人攻湟鄯詔雄與苗履援之邈川方急雄適至羌望見塵起驚而潰圍旣解遂趨鄯州履後期乃至瞻言蘭溪宗有遺寇宜悉蕩平之履卽往雄諫不聽戒所部嚴備以待俄而履師退賊追及雄整衆迎擊破之獻馘二千哲宗遣中使持詔勞問徙

河州种朴戰沒王贍軍陷敵中雄自鄯至湟四戰皆捷拔出之遂築安鄉關夾河立堡以獲浮梁通湟水漕運商旅負販入湟者始絡繹於道加復州防禦使建中靖國初議棄湟州詔訪雄利害雄以爲可棄遂以賜趙懷德徙雄知熙州進華州觀察使蔡京用王厚復河湟治棄地罪停雄官光州居住三年得自便後論爲責輕復竄金州明年乃聽歸高永年死西寧諸戍阻絕起雄權經略熙河安輯復新邊使知滄州加捧日天武四廂都指揮使復爲熙州遷安德軍節度觀察留後步軍副都指揮使拜武康軍節度使召詣闕爲中太一宮使引疾納節鉞改左金吾衛上將軍又以武康節知熙州熙河十八年間更十六帥唯雄三至凡六年未幾以檢校司空奉寧軍節度使致仕卒贈開府儀同三司諡武憲

苗履

按宋史苗授傳授子履束髮從戎授之降木征也履護送至京得閣門祇候歷熙延渭秦四路鈐轉知鎮戎軍及其父時已官四方館使吉州防禦使矣以事竄房州起爲西上閣門副使熙河都監又責右清道率府率監峽州酒稅元符初悉還其官以熙河蘭會都鈐轄知蘭州詔同王贍取青唐與

姚雄合兵討峽羌箋羅結贍將李忠戰敗羅結大集衆宣言欲圍青唐履雄將至羌列陣以待勢甚盛履叱軍士納弓於韃拔刀而入羌怙巢穴殊死鬪梟將陳迪王亨輩皆反走履獨駐馬不動有酋青袍白馬突而前手劍擊履帳下王拱以弓格之僅免復繞出履背欲斷軍爲二別將高永年率所部力戰數十合羌退乘勝圍蘭宗堡弗能拔日暮收兵入營羌宵潰明日縱兵四掠焚其族帳而還旣而阿章叛詔履與种朴過河討蕩辭以兵少朴遂陷錄履前功擢龍神衛四廂都指揮使成州團練使知慶州徙渭州進捧日天武都指揮使是後史失其傳子傳在叛臣傳

王厚

按宋史王韶傳韶子厚字處道少從父兵間暢習羌事官累通直郎元祐棄河湟厚上疏陳不可且詣政事堂言之不聽紹聖中用薦者換禮賓副使幹當熙河公事會羌酋瞎征隴拶爭國河州守將王贍與厚同獻議復故地元符元年六月師出塞七月下邈川降瞎征九月次青廣隴拶出迎遂定湟鄯詔賜隴拶姓名曰趙懷德進厚東上閣門副使知湟州旣而他種叛合兵來攻厚不能支朝廷度二州不可守乃以昇懷德而貶厚右內府率再貶賀州別駕崇寧初蔡京復開邊還厚前秩於是

羌人多羅巴奉懷德之弟溪賒羅撒謀復國懷德畏逼奔河南種落更挾之以令諸部朝廷患衆羌
屬結命厚安撫洮西遣內省客使童貫偕往多羅巴知王師且至集衆以拒厚聲言駐兵而陰戒行
羌備益弛乃與偏將高永年異道出多羅巴三子以數萬人分據險厚進擊破殺之唯少子阿蒙中
流矢去道過多羅巴與俱遁遂拔湟州以功進威州團練使熙河經略安撫三年四月厚帥大軍次
於湟命永年將左軍循宗水而北別將張誠將右軍出宗谷而南自將中軍趨綏遠期會宗哥川羌
置陳臨宗水倚北山谿賒羅撒張黃屋建大旆乘高指呼望中軍旗鼓爭赴之厚麾遊騎登山攻其
背親帥彊弩迎射羌退走右軍濟水擊之大風從東南來揚沙翳羌目不得視遂大敗斬首四千三
百餘級俘三千餘人羅撒以一騎馳去其母龜茲公主與諸酋開鄯州降厚計羅撒必且走青唐將
夜追之童貫以爲不能及遂止師下青唐知羅撒留一宿去貫始悔之厚將大軍趣廓州酋落施軍
令結以衆降遂入廓州超拜厚武勝軍節度觀察留後明年羅撒復入寇永年戰死羌焚大通河橋
以叛新疆大震厚坐逗遛降郢州防禦使已而趙懷德約降未決厚以書諭之懷德卽納款還厚舊
官入朝提舉醴泉觀卒贈寧遠軍節度使諡曰莊敏